

Na osnovu člana 3. Zakona o nezavisnim i nadzornim tijelima policijske strukture Bosne i Hercegovine („Službeni glasnik BiH“, br. 36/08) i člana 11. Poslovnika o radu Nezavisnog odbora kao nezavisnog tijela policijske strukture Bosne i Hercegovine („Službeni glasnik BiH“, br.93/09), Nezavisni odbor na 4. sjednici održanoj 22. decembra 2009.godine, donio je

ODLUKU

o uslovima i kriterijima za odabir, postupak ocjenjivanja i utvrđivanja rang-liste najuspješnijih kandidata otvorene konkurencije za izbor direktora i zamjenika direktora policijskih tijela Bosne i Hercegovine

Član 1.

(Predmet)

Ovom Odlukom utvrđuju se uslovi i kriteriji za odabir i ocjenjivanje kandidata radi sačinjavanja rang-liste najuspješnijih kandidata otvorene konkurencije za direktore i zamjenike direktora policijskih tijela Bosne i Hercegovine.

Član 2.

(Uslovi javnog konkursa)

(1) Kandidat za pozicije iz člana 1. ove Odluke mora ispunjavati opće i posebne uslove propisane Ustavom Bosne i Hercegovine i važećim zakonima.

(2) Opći uslovi su: da je stariji od 18 godine, da je državljanin Bosne i Hercegovine, da nije otpušten iz državne službe u Institucijama BiH, odnosno entiteta kao rezultat disciplinske mjere u periodu od tri godine prije dana podnošenja prijave za upražnjene pozicije, da je zdravstveno sposoban za obavljanje navedenih poslova na koje se prijavljuje, da se protiv njega ne vodi krivični postupak, da nije osuđen za krivično djelo, sa izuzetkom krivičnih djela protiv sigurnosti saobraćaja i da nije obuhvaćen odredbom člana IX. 1. Ustava Bosne i Hercegovine.

(3) Posebni uslovi su:

- a) da posjeduje visoku stručnu spremu-VII stepen i radno iskustvo u toj spremi u trajanju od najmanje pet godina,
- b) da ima čin glavnog inspektora policije ili viši čin i najmanje tri godine rada u tom činu i
- c) da nije član političke stranke.

Član 3.

(Raspisivanje javnog konkursa)

(1) Nezavisni odbor donosi odluku o raspisivanju javnog konkursa za provođenje procedure izbora direktora i zamjenika direktora policijskih tijela BiH.

(2) Nezavisni odbor utvrđuje tekst javnog konkursa.

(3) Tekst javnog konkursa mora sadržavati sljedeće uslove predviđene zakonom:

- a) naziv pozicije za koju se raspisuje javni konkurs i broj izvršilaca,
- b) opis poslova za navedenu poziciju,
- c) opće i posebne uslove za kandidate,

- d) spisak dokumenata koje je potrebno dostaviti,
- e) adresu na koju se prijava sa dokumentima dostavlja uz upozorenje „NE OTVARATI“.,
- f) upozorenje da se neblagovremene prijave neće razmatrati a da će nepotpune i neuredne prijave biti odbačene.

(4) Odluku iz stava (1) i tekst javnog konkursa iz stava(3) ovog člana radi objave Nezavisni odbor posredstvom stručnih službi Parlamentarne skupštine BiH dostavlja „Službenom glasniku BiH“, „Službenom glasniku Brčko Distrikta BiH“, te u tri dnevna lista velikog tiraža sa područja oba entiteta, a biće objavljen i na web stranici Parlamentarne skupštine BiH.

(5) Rok za podnošenje prijave na javni konkurs je najkasnije 15 dana od dana objavljivanja u „Službenom glasniku BiH“, a što će biti naglašeno u konkursima i dnevnim novinama iz stava (4) ovog člana.

(6) U slučaju da po isteku roka za prijavu broj zaprimljenih prijava bude nedovoljan za stvarnu konkurentnost, Nezavisni odbor će u narednom roku od 15 dana ponovo oglasiti upražnjena mjesta. U slučaju ponovnog oglašavanja podnosilac prijave koji je već ranije priložio dokumentaciju dužan je obnoviti prijavu, ali nije obavezan ponovo dostavljati traženu dokumentaciju.

Član 4.

(Dokumenti koji se prilažu uz prijavu na konkurs)

Uz prijavu na javni konkurs kandidat treba da priloži sljedeće orginale ili od nadležnog organa ovjerene dokumente:

- a) radnu biografiju,
- b) fakultetsku diplomu,
- c) ličnu kartu izdatu od CIPS-a,
- d) uvjerenje o državljanstvu, ne starije od šest mjeseci,
- e) dokaz da nije osuđen za krivično djelo, sa izuzetkom krivičnih djela protiv sigurnosti saobraćaja, ne starije od tri mjeseca,
- f) ovjerenu izjavu da nije otpušten iz državne službe u Institucijama BiH, odnosno entiteta kao rezultat disciplinske mjere u periodu od tri godine prije dana podnošenja prijave za upražnjenu poziciju,
- g) ovjerenu izjavu da nije obuhvaćen odredbom člana IX. 1. Ustava BiH,
- h) ljekarsko uvjerenje,
- i) ovjerenu izjavu da nije član političke stranke,
- j) uvjerenje o traženom radnom iskustvu u navedenoj struci izdato od relevantne institucije,
- k) dokaz da se ne vodi krivični postupak i
- l) dokaz da je obavljao poslove i zadatke u činu glavnog inspektora policije ili višem činu u trajanju od tri godine.

Član 5.

(Provjera valjanosti i kompletnosti prijave)

(1) Nezavisni odbor će razmotriti sve pristigle prijave i provjeriti da li su kandidati, u skladu sa uslovima iz javnog konkursa, dostavili valjane dokaze o ispunjavanju općih i posebnih uslova.

(2) Nezavisni odbor će odbaciti prijave kojima nedostaju neki od dokaza o ispunjavanju uslova iz javnog konkursa (nepotpune) i prijave sa nevalidnim dokazima (neuredne). Neblagovremene prijave Nezavisni odbor neće razmatrati, te će nakon što to konstatuje, o toj činjenici svojim aktom obavijestiti podnosioca prijave.

(3) Nakon izvršene provjere u skladu sa stavom (1) ovog člana, Nezavisni odbor će radi vođenja evidencije sačiniti spisak prijavljenih kandidata čije su prijave odbijene.

(4) Nakon izvršene provjere u skladu sa stavom (1) ovog člana Nezavisni odbor će sačiniti listu prijavljenih kandidata čije su prijave prihvaćene i koji će biti pozvani na intervju.

Član 6. (Intervju)

(1) Intervju je razgovor članova Nezavisnog odbora sa kandidatima čije su prijave prihvaćene. Cilj intervjuja je da se utvrdi stručnost i osposobljenost kandidata za obavljanje propisanih poslova, te krajnja i sveukupna ocjena kandidata.

(2) Od kandidata će se prije intervjuja zahtjevati da saopšti podatke o ranijim rukovodiocima od kojih je moguće dobiti preporuke.

(3) Kandidat je obavezan otkriti bilo koju činjenicu koja bi mogla dovesti do sukoba interesa u slučaju njegovog imenovanja, te se tokom intervjuja izjasniti o nacionalnoj pripadnosti.

(4) Pitanja na intervju mogu se odnositi na provjeru, odnosno pojašnjenje podataka iz biografije, pojašnjenje u vezi sa ispunjavanjem uslova javnog konkursa, dodatnim, posebnim, stručnim znanjima, vještinama i ostvarenim rezultatima, priznanjima i iskustvima, te afinitetima kandidata. Pitanja mogu biti vezana za sukob interesa kandidata, opća znanja koja ne moraju biti u direktnoj vezi sa pozicijom za koju je raspisan konkurs, ali mogu pomoći članovima odbora da rangiraju kandidate za ovu poziciju. Mogu se postavljati i druga pitanja, ali samo pod uslovom da nisu usmjerena protiv ličnog integriteta kandidata.

(5) Osim pitanja za razjašnjenje podataka iz prethodnog stava, članovi Nezavisnog odbora mogu postaviti do tri pitanja iz stručnih oblasti navedenih u članu 7. stav (1) ove Odluke.

(6) U slučaju da na intervju bude pozvan veći broj kandidata, intervju se može održavati više dana, cijeneći neophodno vrijeme za svakog kandidata.

Redosljed kojim će kandidati pristupiti intervjuu biće utvrđen abecednim redom prema prezimenima kandidata.

Član 7. (Ocjenjivanje kandidata)

(1) Prijavljeni kandidati koji ispunjavaju uslove javnog konkursa za izbor direktora i zamjenika direktora policijskih tijela BiH, ocjenjuje se i boduju od 0 do 100 iz pokazanog znanja iz oblasti Ustavno-pravnog poretka BiH, znanja iz oblasti predkrivičnog postupka, materijalno-pravne legislative iz oblasti sigurnosti i policijskih poslova, kao i međunarodno - pravnih odnosa u ovim oblastima.

(2) Nezavisni odbor utvrđuje obrazac za ocjenjivanje, prema kriterijima iz stava (1) ovog člana, koji popunjavaju članovi Nezavisnog odbora nakon obavljenog intervjuja.

(3) Ocjene članova Nezavisnog odbora za svakog kandidata pojedinačno sabiraju se i dijele sa brojem prisutnih članova Nezavisnog odbora. Dobijeni količnik je ocjena kandidata.

(4) O glasanju za svakog kandidata vodi se evidencija.

(5) Nezavisni odbor neće u javnosti otkrivati dokumente o rezultatima glasanja.

Član 8.

(Dokumentovanje bodovanja kandidata)

Intervju sa kandidatima snima se audio tehnikom, a transkript o obavljenom ispitivanju predstavlja dokument za nezavisne provjere propisane odredbom iz člana 3. stav (2) tačka c) Zakona o ministarskim imenovanjima, imenovanjima Vijeća ministara i drugim imenovanjima Bosne i Hercegovine ("Službeni glasnik BiH", broj 37/03) i čini sastavni dio zapisnika o radu Nezavisnog odbora, kao i pregled ocjena za kandidate.

Član 9.

(Sačinjavanje prijedloga jedinstvene rang-liste nakon intervjuja)

(1) Nakon provedenog postupka ocjenjivanja i bodovanja kandidata, Nezavisni odbor vrši odabir i dostavlja ministru sigurnosti BiH rang-listu najuspješnijih kandidata, odnosno imena najviše pet kandidata za direktore, imena najviše pet kandidata za zamjenike direktora policijskih tijela BiH, prema broju osvojenih bodova.

(2) Nezavisni odbor će u izvještaju ministru sigurnosti BiH, nakon predložene jedinstvene rang-liste, posebno navesti imena i bodove za ostale kandidate sa kojima je obavljen intervju.

(3) Daljnja procedura izbora propisana je u članu 13. Poslovnika o radu Nezavisnog odbora.

Član 10.

(Stupanje na snagu)

Ova odluka stupa na snagu danom donošenja.

Broj: 03-34-6-36/10

Sarajevo: 5.1.2010. /09

